

7

A GABRIELE
(fizu de fiza mia)

Tottu sos Santos, sa notte serena
a Issos dedicada
t'hant in terra imbiadu in forma umana,
creadura minore
Arcangelu novellu in s'innocenzia,
pro render coronada s'isperanzia
de babbu e de mamma
chi viviant in brama
de suggellare in te s'eternu amore.

Calchi minutu a mesanotte appena
has fattu s'arrivada
e cun doighi colpos sa campana
de sa cheja mazore
t'hat fattu armoniosa reverenzia.
De sedas ricamadas in s'istanzia
cun sas lagrimas mama
hat infustu 'ogni trama
pro sa gioia, su dubbiu e su dolore.

No has piantu; abite d'èss pianghere
cando has sa fortuna
d'esser nàdu sa notte de sos Santos,
cando ses Gabriele
e s'Arcangelu a tie ti est custode?
Deo devo piangher ca s'edade
m' irransigat sa vida;
sa rughe appesantida
suore amaru ingenerat che fele.

Ma ca m' est impossibile a mi franghere
de sa morte importuna,
de terrare a s'edade 'e sos incantos
tottu tucaru a mele,
ancora pro cust' ateru neode
Santos, unu favore m' alcanzades
cunzedidemi vida
chi mannu in gradu lu 'ida
poi... si gioghet sa Parca crudele!

Prantaferu

S'era noa

Sas mannas de su mundu intelligenzias
sunt tottas dedicadas hoc in die
a isplorare s'immensu infinitu
de brillant sos astros de s'aera
e a proas de pare
sos Mazores s'affanant in s'intentu
de resesser sos primos a domare
sas forzas de su bentu,
de sos rajos solares sa calura
e s'arcanu segretu 'e sa Natura

Macchinas infernales mostruosas
mandant in altu ordinzos a sa luna
cui intro dilicados istrumentos
e scrighes, munincas e catteddos
sos cales cun sa vida
pagant sa brama de umanos cherveddos,
Si cheret arrivare a ogni costu
fin'a sa luna e plus in altu ancora
cun proas e r&proas
de chentu micidiales armas noas

In isulas desertas, in Siberia
che frundint unu mare de ricchessa
(e tanta zente vivet in miseria)
sos batter Mannos, sutta su delliriu
de milli isperimentos
de armas inventadas pro sa paghe...
e pro sa paghe chilcant un'accordu
ma non s'accordant mai
ca de pala in coddu dant sa neghe
e intantu su tempus passat gai

Mentres paghe sos populos isperant
s'arrivet a sa Luna e a Marte ancora
Deus nde salvet si pro mala sorte
de cussas impiantos
nde d&nt fagher invece ater' impreu
si si torrant da'nou sos potentes
a mostrare sas dentes
Tando sa luna restet in sa luna
e pro su mundu intreu
torrant luttos, disastros e piantos!

Frantaferru